

## **U B'AXA U' ITZ'IB'A B'EN U PABLO XE' U TIMOTEO**

*Yol ti' u u' tza'*

Aatz u Timoteo va'l k'ulun u u' tza', u locholich tetz u Pablo ti' ipax paal itziiul u b'a'nla chusb'al. A' ixe't k'atz u Pablo tu u ka'paj ib'en ti' ipaxsal itziiul u b'a'nla chusb'al tuch' u Silas tu u tenam Listra. Choktaj Q'u B'a'nla Chaj Kam B'anel (Hechos) 16.1-3; 17.14-15; 18.5; 19.22; 20.4. Aatzich u tatin u Timoteo k'atz u Pablo tzi', echa' ma'j copastoor.

Aatz u U B'axa U' Xe' U Timoteo tza', a' tz'ib'an u Pablo utz, taq' b'en tzixe' tixo'l q'u ya'b' 63 — 65 m.t.J. Kamal tu Macedonia itz'ib'ava utz, taq' b'en tu Eefeso, xe' u Timoteo. Tan obreroich u Timoteo tu Eefeso.

Kam koj toke' itz'ib'ata', pek ti' taq'ax b'en itxumb'al u Timoteo ti' aas kani'ch tiq'ol q'u niman tetz u Jesuus si'ane'. Tan nital tu u Timoteo aas kani'ch inuk'it tib' q'u niman tetz u Jesuus si'ane'. Kam itxumb'al samotxi'ane' sijununil utz, tib'ilaj; kani'ch tiq'ot tib' samotxi'ane' niyolonka.

Nital te majte aas samotxi'an kuenta tib' tu q'u sub'ulla chaj chusul. Aya' unjolol q'u Israeel nichipaal xo'l q'u niman tetz u Jesuus, q'u'l nich-tale' aas ministeer anko'xh sanimal u o'tla mantaar k'uxh ma't tok ti' u Jesuus. A' q'u ye'xtxo]la chaj chusb'al q'u'l atich tek tixo'l.

Ech a' vib'o'q'ol nitale' viq'ilal isik'le Tioxh ti' q'u kam. Utz nital majte aas kam b'aner titxumb'al q'u q'esala q'u'l saoksal tu q'esalail xo'l q'u niman

tetz u Jesuus. Utz nichus u Timoteo majte aas kam si'an ti' itx'olax inujul junun kam xo'l q'u niman tetz u Jesuus.

A' u jatxb'al tib' q'u yol tu u u' tza'.

- 1) 1.1-2 Nitaq' chajlichil u Pablo tu u Timoteo.
- 2) 1.3-11 Nitale' sauch kuentaib' tu q'u ye'xtxojla chusb'al.
- 3) 1.12-20 Nital ti' u tijle'm u Pablo.
- 4) 2.1-15 Nital ti' viq'ilal isik'lel Tioxh.
- 5) 3.1-7 Nital ti' q'u kam sailax k'atz q'u'l saok tu ansianoil.
- 6) 3.8-13 Nital ti' q'u kam sailax k'atz q'u'l saok tu diaakonoil.
- 7) 3.14-16 Nital ti' vitxumb'al u Tioxh va'l ye'ich ootzajimal.
- 8) 4.1-5 Nital ti' q'u aanima q'u'l saelka ti' u Tioxh.
- 9) 4.6-16 Nital ti' vitxumb'al u b'a'nla ta'qonom u Jesuus.
- 10) 5.1—6.2 Nital ti' q'u txumb'al sab'a'nb'el ib'ilaj.
- 11) 6.3-10 Nitale' aas echen saku' kuk'u'l ti' u getz atile.
- 12) 6.11-19 Nital ti' u ela'okchil ti' u atinchil k'atz u Tioxh.
- 13) 6.20-21 Nital unjolol txumb'al tu u Timoteo.

## *U B'AXA U' ITZ'IB'A B'EN U PABLO XE' U TIMOTEOTEO*

### *Ichajlichil u Timoteo*

<sup>1</sup> In Pablo, ichaj u Jesucristo titzii u Tioxh, u Chitol qetz. Utz titzii u kuB'aal Jesucristo majte va'l nikuch'ia tuch' txuq'txunchil tan, sataq'o' tu b'a'nil. <sup>2</sup> Nunq'ilab'enaxh Timoteo tan, nojchit

unk'aol aatin ti' u kuminat u Jesuus. Utz u Tioxh, u kuTat tuch' u kuB'aal Cristo Jesuus koj aq'on ku'l vib'a'nil sai'. Itxum koj aatz. Utz atin koj u paas tavaanima taq'o majte.

### *Q'u ye'xtxoja chaj chusb'al*

<sup>3</sup> Aatz si'chtek'b'enin tu Macedonia, val see aas sakaa'axh tu Eefeso. Ech samaj iatz q'u aanima q'u'l nichus unjot ye'xtxoja chaj chusb'al. <sup>4</sup> Utz ye'k sab'en ik'u'l q'u niman tetz u Jesuus ti' tab'il ok kam aas yol ko'xhtu' chulimal ko'n. Niko'xh sab'en ik'u'l ti' q'u tachul q'ul ik'uy imam q'ul ib'ena' ib'en ko'xhtu'. Tan kam koj itxa'k. Kam koj nilochonku ti' qiq'ot kuyak'il k'atz Tioxh. Pek aal yaayoli'b' ko'n nituch ti'. Ech a' va'l ni'xhval see cheel samaj iatz.

<sup>5</sup> Tan a' nital u kuchusb'al tza' aas nojchit xe' taanima u aanima sak'asku'l vib'antu tii ti' imol. Tiira tinachb'al sa'atinka aas b'a'n va'l ni'ane'. Sik'uche' aas nojchit suula k'ujlel ik'u'l ti' u Tioxh; yit' niko'nkoxhteesa ivatz. <sup>6</sup> Tan atil unjolol aas elyuka ti' ib'anax q'u kam nivale' tza'. Utz a' tek nitz'ejxik ti' unjot chulin yol aas ye'k itxa'k. <sup>7</sup> Nimotxtaq' b'en tib's mamaj chusul tetz u o'tla mantaar. Pek k'uxh ech nimotxtal je' ti', aal ye' tootzaj. Utz ye' nitel itxumb'al tu q'u kam q'u'l nitxakb'a' talaxe'.

<sup>8</sup> Tan b'a'n u o'tla mantaar. Kankojtu', aas oj nojchit sanimali kam chit echa' va'l tal u Tioxh. <sup>9</sup> Utz qootzajle aas ti' koj q'u aanima jikom ni'ane' alaxku q'u mantaar tzi!. Pek tx'olb'al tetz inujul q'u b'anol onkonil, q'u qelol, q'u aa paav, q'u'l kam koj itxa'k nima Tioxh te, q'u'l ye'k tatin u Tioxh siatz, q'u yoq'ol Tioxh, q'u yatz'ol itxutx ib'aal utz,

tuch' kajay q'u yatz'ol, <sup>10</sup> tetz q'u eesanib' tu b'ey tuch' aanima, q'u q'ilan ok tetz vinajil, tetz ixojil, q'u elq'an aanima, q'u txub'a'lom, q'u txakb'a'n txub'a'l utz, tetz kajay q'u'l nixe'k'ulan q'u jikomla chusb'al. <sup>11</sup> Aya' u techalla b'a'nla chusb'al tetz u Tioxh va'l kaana b'a'nil tzixe', va'l nunpaxsa paal itziuil.

### *Vik'amab'el u Tioxh*

<sup>12</sup> Ni'xhunk'ama tu u kuB'aal Cristo Jesuus tan, vetitxaa'in; k'ujleb'al k'u'l in siatz, vettoksa'in ti' ipaxsal itziiul viyolb'al. Utz ni'xhtaq' unyak'il ti' ib'anaxe'. <sup>13</sup> K'uxh aal inich yoq'ol Tioxh. Inich yoq'ol tetz q'u niman Tioxh. Nichunb'an unk'u'l ti', nichvojcha. Utz aal tx'anel munk'ulaxe', txumax unvatz tan, ye'xhkamich vootzaj utz, ye' nichunnima.\* <sup>14</sup> Ech sib' u b'a'nil vettaq' u kuB'aal ve. Tii vi' utz, nik'uje' unk'u'l ti' u Cristo Jesuus taq'o.

<sup>15</sup> Jikomla yol va'l savale' tza' utz, tiira b'a'n aas kajay aanima saniman. K'uxh ul u Cristo Jesuus tu u vatz amlika tx'ava' tza', ti' ichitpul q'u aa paav ulka. A' chit unma'l in tan, tiira in aa paav majte. <sup>16</sup> Pek k'uxh mam paav b'anel vaq'o, vetitxum unvatz u Tioxh. Utz tu vikuyt'in u Jesucristo, ma'l k'uchb'al vettaq'a aas tiira ye'k iya'eb'al vikuyune'. Ech in k'uchb'al vatz q'u aanima oj sinima, sik'ul u atinchil tu b'enq'ii b'ensaj. <sup>17</sup> Ech toke' aatz u mam tokeb'al q'ii utz, kajay u mam techalil, tetz u Tioxh. Aya' u q'esal ijlenal va'l ech ko'xh ib'en u tijle'm, u Tioxh va'l ye'k tokeb'al u kamchil ti', va'l ab'il koj ma'j ilonnaj

---

\* **1:13** Choktaj Q'u B'a'nla Chaj Kam B'anel (Hechos) 8.3; 9.4-5.

iatz. Ni'xhik'ulo'k ti' saoksal iq'ii. Tan ta'xh ma'l aa txumb'alla Tioxh b'enamen. Ech ko'xh ib'en u tatine'. A'i.

<sup>18</sup> Unk'aol chi'in Timoteo, tii aab'i u chusb'al nival see tza'. Anko'xhtu' u yol k'asu'l xe' Tioxh, va'l alax see aas axe't chitu'. K'uxh nival see, a' unsa' siiq'o ayak'il ti' imajax u ye'xtxoj. Ech sa'ane' va'l ni'an ma'j aa ch'a'o ti' imajax ivatz u koontra. <sup>19</sup> Tii k'ujloj ak'u'l ti' u Tioxh utz, iq'o ayak'il; oksa tetz vab'a'nla nachb'al vatz Tioxh. Tan atil unjolol aanima ye't ib'an q'u kam nival see tzi'. Ye' nitiq'o iyak'il tu va'l nital u b'a'nla chusb'al. Elyuka ti'; ku'ya. Veti'anlu tetzan u vaarko va'l niko'p jaq' a'. <sup>20</sup> Antu tixo'l q'u aanima tzi' u Himeneo tuch' u Alejandro. Utz vetveesal xo'l q'u niman tetz u Jesuus, vaq'luka vatz u tx'i'lli'inaj; ech satootzaji aas ech ko'n koj u qelonchil.

## 2

### *Viq'ilal sik'lel Tioxhti' q'u aanima*

<sup>1</sup> Ni'xhval see aas q'ilataj sik'letaj chit Tioxh ti' q'u aanima kajayil. Jajtaj tu u Tioxh aas sitxum iatz. Jajtaj q'u kam te q'u'l nisavsa. Utz k'amab'etaj ti' q'u b'a'nil ni'ane'. <sup>2</sup> Q'ilataj sik'letaj Tioxh ti' q'u ijlenal tuch' ti' tere'n q'u q'atb'al tzii. Ech tx'anel ko'xh qatin si'an taq'o; ye'k txab'kin. Pek a' chit sab'anax va'l b'a'n vatz Tioxh. Utz tijikomal sab'anax q'u kam. <sup>3</sup> Tan a' q'u kam b'a'n tzi' utz, tx'anel ni'enku tu u Tioxh, u Chitol qetz. <sup>4</sup> Tan a' isa' aas kajay q'u aanima sachitpu tu q'ul ipaav utz, satootzaji vinujul. <sup>5</sup> Tan ma'l ko'n Tioxh atile. Utz ma'l ko'n u vinaj oksan tetz q'u aanima vatz u Tioxh, aya' u Jesucristo va'l b'ennaj ko'n

aanima. <sup>6</sup> A' va'l taq' tib' tu kamchil ti' ichool  
vipaav q'u aanima, ech tel vatz u choob'al paav.  
Utz a' i'anta' tu u tiempo va'l k'ajel nal ti' taq'o.  
<sup>7</sup> A' u vetz aq'el aas sunchus tu q'u puera aanima  
kani'ch ik'uje' ik'u'l ti' Tioxh utz, sunchus vinujul.  
Tan u Tioxh va'l vet'oksanin ti' ipaxsal itziul. Ech  
in ichaj u Jesucristo. Nojchit va'l nivale' tza', yit'  
txub'a'l koj.

<sup>8</sup> Nival see aas q'ilataj sik'letaj Tioxh, k'uxh  
til chaj ko'xhtu'. Tuch' chit etaanima ye'k paav  
sek'atza tuul seq'ila sik'le Tioxh; ye'k k'a'nal; ye'k  
yaayoli'b' sek'atza.

<sup>9</sup> Nival tu q'u ixoj majte aas jik chit q'u toksa'm  
satoksa; jik ko'xh sivij tib'. Yit' tuch' koj t'e'su'ib'  
si'ane'. Ta'n ko'nkoxh sab'en ik'u'l ti' ichantixsal  
iveet q'u xi'l ivi'. Niko'xh sipaasa ivi' toksal b'a'nla  
q'an ch'ich' tuch' perla. Utz a' koj satz'ejxik  
ti' ivijtu tib' tu je'najla chaj oksa'm.\* <sup>10</sup> Pek a'  
satitz'a ik'uchax u b'a'nil, ech sik'uche' aas jolol  
ixoj nachol Tioxh. <sup>11</sup> Sako'ntab'i u b'a'nla chusb'al  
q'u ixoj. Ye'k yol si'ane'; sako'nab'ini. <sup>12</sup> Yit'  
sa'kojchusun u ixoj. Yit' sa'kojipaasa tib' vatz q'u  
vinaj. Pek sako'nijutxb'a' tib'. <sup>13</sup> Tan a' b'axal i'an  
u Tioxh u Adaan, ech tek u Eva. <sup>14</sup> Utz yit' u Adaan  
koj va'l b'axal sub'lu tu u tx'i'li'inaj, pek u ixoj va'l  
sub'li. Ech ku'tu u qelb'alil.† <sup>15</sup> Utz simaj tib' vatz u  
paav oj a'satilb'e titz'in utz; b'enamen k'ujlel ik'u'l  
ti' u Tioxh. Sitz'ej taanima ti'. Utz saxaane'l k'atz  
paav. Jikom ko'xh si'an q'u kam; yit' tuch' t'e'sil  
koj.

\* **2:9** Choktaj u B'axa U' Itz'ib'a U Lu' 3.3.

† **2:14** Choktaj u

Geenesis 2.7, 21-22; 3.1-6.

**3***Vitxumb'al q'u'l so'ok q'esalail*

<sup>1</sup> Tiira ib'o'q'ol q'u yol tza': —Ab'il a' nitachva q'esalail xo'l q'u niman tetz u Jesuus, b'a'nla aq'on nititz'a atzi!— <sup>2</sup> Pek loq' ministeer tiira b'a'n itxumb'al u q'esala tzi', ech paat ye'xhkam ti' saelk iq'ii. Ma'lko'n tixoj atile. K'ujleb'al k'u'l itxumb'al. Ilel chit ib'anax q'u kam ni'ane'. Jik vib'anone'. Aq'ol ivatb'al aanima. Utz techal ichusune'. <sup>3</sup> Yit' q'ab'areella aanima koj. Yit' chokol ch'a'o koj. Yit' achvan koj ok iatz kam aas sub'u'm isa' ti'. Yit' ye'k koj inooeb'al ti' itx'akax puaj. Pek jik ko'xh itxumb'al. Nitoksa paas xo'l aanima. <sup>4</sup> Nitx'ol tiq'ol q'u kam tu tatib'al. Jik atil q'ul ik'aol ime'al jaq' imantaar, tinujul ninimane'. <sup>5</sup> Tan oj ye' nitx'ol tiq'ol q'u kam tu tatib'al, ¿a' tzik sitx'ol tiq'ol q'u niman tetz u Jesuus? <sup>6</sup> Yit' anal koj ak' ti' inimal u Jesuus. Tan b'a'n si'ane' aas saku' tu paav tu t'e'sil ti' u tijle'm. Echa' va'l isa' u tx'i'l'i'inaj. <sup>7</sup> Ministeer b'a'n talchu xo'l q'u aanima majte q'u'l yit' niman koj tetz u Jesuus. Ech ye'k se'el iq'ii utz, ye'k saku' tu va'l isa' u tx'i'l'i'inaj.\*

*Vitxumb'al q'u'l so'ok diaakonoil*

<sup>8</sup> Echat ko'xh q'u diaakono majte. Echen b'a'n itxumb'al, inujul si'ane!. Yit' ka'l koj tel iyol. Yit' q'ab'areella aanima koj. Utz yit' achvan koj ok iatz kam aas sub'u'm isa' ti'. <sup>9</sup> Tii tatin tu vinujul u chusb'al va'l nikunima va'l anal nitootzajil tu u b'a'nla chusb'al. Nojchit tinachb'al si'an vinujul. <sup>10</sup> Loq' aatz ye'saj tok tu diaakonoil, b'axal nal

---

\* **3:7** Choktaj U Tito 1.6-9.

si'ilax inujul b'a'nil, yetz kam ti' niyolpika aas sa'eesalk iq'ii. Oj b'a'n, ech nal so'oki.

<sup>11</sup> Echat ko'xh q'u ixoj diaakonisa majte. Echen jikom itxumb'al. B'anol inujul. Yit' chulin yol koj. Pek k'ujleb'al k'u'l ti' q'u kam kajayil.

<sup>12</sup> Ma'l ko'n tioxoj q'u diaakono sa'atini. Sitx'ol tiq'ol q'ul initxa'a tuch' q'u kam tu tatib'al.

<sup>13</sup> Tan aatz q'u'l ni'xhitx'ol ib'anax u taq'on tu diaakonoil, saoksal iq'ii ti'. Utz sa'tere'nk'uje' ik'u'l ti' u Tioxh tu u b'a'nla chusb'al k'atz u Cristo Jesuus.

### *U taltu u Pablo kam toke'itz'ib'a u u' tza'*

<sup>14</sup> K'uxh nivitz'a sa'naloponin tzaxe', nuntz'ib'a opon talax see kam sa'ane'. <sup>15</sup> Ech oj lab'atz vopone', ootzaj teku'en kani'ch iveet q'u kam sa'an xo'l q'u nachol tetz u itz'lich Tioxh. Aya' vitenam u Tioxh, vixe'al q'u kam inujul, va'l txakb'a'n tetz vijikomal. <sup>16</sup> Tiira sib' tokeb'al vitxumb'al u Tioxh va'l ye'ich ootzajimal ti' u okchil k'atza. Tan echa' va'l nitale' tza':

Vettaq' b'ens tib' aanima u Tioxh qi'.

Aq'ax b'ens b'a'n tiq'aq'al u Tioxhla Espiiritu maje.

Ilax u q'aavtitz'peb'al tu q'u aanjel.

Paxsal itziiul xo'l q'u puera aanima.

Nimal tu q'u aanima tu u vatz amlika tx'ava'.

Utz ech tek b'enje' tu Amlika tu

vitechalil u Tioxh.†

---

† **3:16** Aatz q'u yol tzi', kamal iyolil ma'l u b'itzal ootzajimich tu q'u niman tetz u Jesuus titiempo u Pablo.

## 4

*U taq'axka u b'a'nla chusb'altu u motxeb'al q'ii  
saj*

<sup>1</sup> Pek vatzsaj nital u Tioxhla Espiiritu aas sa'atin untx'ajul q'u niman tetz u Jesuus saq'aav ti'; saelka ti' vinimal u Jesuus tu u motxeb'al q'ii saj. A' tek satz'ejxik ti' q'u tioxhil onkonil eesanal tu b'ey utz; ti' q'u chusb'al q'u'l u tx'i'li'inaj nicheesan.\* <sup>2</sup> Unjolol ka'vatzla chaj aanima sa'alon q'u chusb'al tzi' aas tiira sub'u'm si'ane'. Tan paat yannaj vinachb'al. Ye' nikan inachaxe' ab'iste u b'a'n, u ye' b'a'n. <sup>3</sup> Aatz q'u chusul tzi', tiira samajon ti' u tzumb'a'a. Utz samajon ti' techb'ul unjolol echb'ub'al aas yit' txaa' koj echb'uli. Tan Tioxh aq'onnajka tetz. Utz aal tokeb'al iq'ii Tioxh. Tan sak'amab'el te utz, saoksal iq'ii tu q'u niman tetz q'u'l tootzaj vinujul aas satechb'u. <sup>4</sup> Tan b'a'n kajay q'u echb'ub'al taq'ka u Tioxh. Ye'xhab'iste ko'xh ma'l txaa' koj, pek ta'n tzii sak'amab'el Tioxh ti'.† <sup>5</sup> Ech sab'a'nixsal tu u Yolb'al Tioxh utz, tu u kuq'ilat sik'let Tioxh ti'.

*Vitxumb'al q'u b'a'nla taq'onomu Jesuus*

<sup>6</sup> Untz'oj b'a'n achustu q'u kam tzi', unchee' axh ma'l b'a'nla taq'onom u Jesucristo. Niiq'o ayak'il tu u yolb'al Tioxh nikunima utz, tu u b'a'nla chusb'al.

<sup>7</sup> Pek ye' ko'xh aab'i ok q'u chulim yol eesab' iq'ii u Tioxh q'u'l ko'xtен cheei. A' tii sooksav iib' ti' ib'anax q'u kam ti' u okchil k'atz Tioxh. <sup>8</sup> Tan aatz q'u kam nib'anax ti' iyak'insal u chi'l; b'a'n

---

\* **4:1** Choktaj u Ka'b' U' Tu Tesaloonica 2.3. † **4:4** Choktaj u Geenesis 1.31.

chitu' loq' b'iil ko'n iq'aq'al. Pek aatz u oksa'ib' k'atz Tioxh, tiira sib' iq'aq'al. Tan alel tu u Tioxh aas saqil iq'aq'al tu u vatz kuq'ii kusaj tu u vatz amlika tx'ava'tza' utz, saqil iq'aq'al tu u atinchil tu u b'enq'ii b'ensaj majte. <sup>9</sup> Tiira ib'o'q'ol u yol va'l savale' tza' utz, b'a'n aas kajay saniman. <sup>10</sup> Tan ta'xh ma'l nikuch'ia tuch' txuq'txunchil u itz'lich Tioxh, aya' u Chitol tetz q'u aanima kajayil. Loq' a' chit unma'l q'u'l nimamal tek u Jesuus taq'o. Ech toke' niqaq' yak'il tu u aq'on ti'. Utz nikuq'i' q'u ye'xtxoj nib'anax qe ti'.

<sup>11</sup> A' q'u'l saale' tzi' utz, sachuse'. <sup>12</sup> Utz ab'il koj saeesan aq'ii ti' k'uxh axh xiak. Ta'xhtzii aas a' chit sak'uch ib'anax u b'a'nil vatz q'u niman tetz u Jesuus, tayolone', tatxumb'al, tab'ant'axh tii ti' aanima, ti' aas aya'l ak'u'l na'ane', ti' vik'uje' ak'u'l ti' u Tioxh utz, ti' axaane'l k'atz u paav. <sup>13</sup> Tuul ko'xh ye'saj vopone', tii noj asik'le u Yolb'al Tioxh xo'l q'u niman tetz u Jesuus. Sachusunaxh ti'. Utz sooksa aanima tu jik tuch!. <sup>14</sup> Txakunsa chit u doon aq'el tu u Tioxh. Aya' va'l alax see aas taq' je' iq'ab' q'u q'esala siib'a ti' iq'ilat isik'let Tioxh sai' aas ookka. <sup>15</sup> Ech tii iitz'a q'u kam tzi' utz, atojchit'ok'axh ti' ib'anle'. Ech kajay sailon aas nakan tiq'ol u yolb'al Tioxh. <sup>16</sup> Nach je' iib' ti' q'u kam na'ane'. Tinujul chit u chusb'al sachuse'. Tan oj ech sa'ane', sachitp'axh tu paav. Utz echat q'u'l sa'ab'in q'ul achusb'al.

## 5

*Vitxumb'al q'u niman tetzu Jesuus tib'ilaj*

<sup>1</sup> Yit' yaael koj q'u q'esla chaj vinaj sa'ane' aas sooksa tu jik. Pek jik chit iq'ilal sa'ane'; echa' iq'ilal atat sa'ane'. Atoj tatin saatz. Utz aatz q'u xiak, echa' atza'q' sa'ane' aas sooksa tu jik. <sup>2</sup> Echat paj q'u q'esla chaj ixoj, ech iq'ilal sa'ane' anan. Utz ech iq'ilal aanab' sa'an tu q'u ixviak. Paat jikom vatxumb'al sa'an te.

<sup>3</sup> Loch q'u txakay ixoj q'u'l nojchit ye'xhab'il ti'.

<sup>4</sup> Pek oj atil titz'in oj tii mam, a' samotxaq'on tetz. Tan ministeer sichus tib' q'u k'aol me'ala te aas a' b'axal siloch itxutx ib'aal. Siq'aavixsa b'oj te va'l aq'ax te tich'ooil. Tan a' u kam b'a'n ni'enku tu u Tioxh. <sup>5</sup> Pek a' saloch va'l nojchit txakay ixoj kaanaj sijunal. A' texh k'ujlelk ik'u'l ti' Tioxh utz, b'enamen niq'ila isik'le Tioxh q'iils aq'b'al.

<sup>6</sup> Pek ech koj u txakay ixoj va'l niteesa itxumb'al tu b'ey, nitoksa tetz u tacha've, tz'ejinaj u tatin vatz Tioxh k'uxh itz'lel tilone!. <sup>7</sup> A' q'u kam sachus te tzi!. Jikom si'ane' ech ye'k sael iq'ii. <sup>8</sup> Tan aatz q'u niman tetz u Jesuus q'u'l ye' niloch u titz'in tatzik aas niya'ta tetz, ye' nik'uche' aas niman tetz u Jesuus. Utz aa paal ivi' vib'anon vatz q'u'l ye' tootzaj Tioxh. Tan ye'xh b'oj nilochone!.

<sup>9</sup> Pek a' saok tu ach xo'l q'u'l salochaxi q'u txakay ixoj q'u'l maas tek 60 iya'b', ma'l ko'n ivinaj atin-naj. <sup>10</sup> Aya' q'u'l k'uchul tetz u b'a'nil tib'anone'. Jik ch'iisamal titz'in taq'o, aq'el ivatb'al aanimtaq'o, tx'aael tajan niman tetz u Jesuus taq'o, lochel aanimtaq'o aas nipaal tu k'axk'o utz, aya' q'u'l ni'an ya'l tib' ti' ib'anax kajay q'u b'a'nil.

<sup>11</sup> Pek ooksach tu ach q'u txakay ixoj q'u'l txul ixoj tere'n. Tan b'a'n si'ane' kam noj tok titxumb'al, ta'xh sapaal tetz noj iqelka u Cristo noj

ik'ul tib' tuch' va't vinaj ye' tootzaj Tioxh. <sup>12</sup> Utz choob'al paav sa'alax iku' ti' oj ech'i tan, ye'n itzo-jpi va'l vettaq' iqul tuul. <sup>13</sup> Utz k'uxh yit' sa'kojb'en ti' vinaj, b'a'n si'ane' sichus q'e'yil; jun texh otzotz ib'en ti'ixaansal yol aas ye'k itxa'k. Utz satoksa tib' tu kam aas ye'k tokeb'al ti'. <sup>14</sup> Pek aal b'a'n satzume' q'u txakay ixoj q'u'l txul ixoj tere'n. Atinoj titz'in. Utz a' satil ime'b'i'l tu tatib'al. Ech ye'k sataq' tzii tu u tx'i'li'inaj sachee yol ti' taq'o. <sup>15</sup> Tan at unjolol aas elyuka ti' u Jesuus utz, a' tek nitoksa tetz u tx'i'li'inaj.

<sup>16</sup> Utz echa' tzi' oj atil txakay ixoj xo'l titz'in tatzik ma'j niman tetz u Jesuus, aal b'a'n a' salochon. Ech ta'xh salochax tu q'u niman tetz u Jesuus q'u'l nojchit ye'xhab'il ti'.

<sup>17</sup> Aatz q'u ansiano q'u'l ni'xhitx'ol tiq'ol q'u kam, nik'ulo'k ti' aas nojchit sib' talche' si'ane'. A' chit ib'o'q'ol q'u'l nipaxsa u yolb'al Tioxh utz, tuch' q'u'l nichusune'. <sup>18</sup> Tan nital u Yolb'al Tioxh tz'ib'amalka aas: —Yit' sa'kojooksa txim vi' iju' u vaakaxh va'l nipaq'e'l triigo.— Chia. Utz nital majte aas: —Nik'ulo'k ti' u aq'onom aas sik'ul ija'mel.— Chia.\*

<sup>19</sup> Yit' yak ko'nkoxh sanima oj ab'il saxochon ma'j q'u ansiano saatz. Pek ministeer sa'atin ka'vo'j oxvo'j aanima aas nojchit ilel ab'imai u kam taq'o va'l saxochlika.†

<sup>20</sup> Ab'iste q'u'l ye'xh niya' ti' ib'anax u paav, yaa vatz q'u niman tetz u Jesuus. Ech saxo'v tere'n q'u aanima; ye'k sapaavini. <sup>21</sup> Tii sanima q'u kam

\* **5:18** Choktaj u Deuteronomio 25.4; U Tio 10.10; U Lucas 10.7.

† **5:19** Choktaj u Deuteronomio 17.6; 19.15.

nivale' tza'. Ni'xhval see vatz u Tioxh, vatz u kuB'aal Jesucristo utz, vatz q'ul iaanjel txaael el taq'o. Ye'xhab'il ko'xh at tela'. Utz ye'xhab'il ko'xh atil tatin saatz sa'an ti' itzojpixsale'.

<sup>22</sup> Yit' ooje'l ko'nkoxh sooksa ma'j aanima tu q'esalail xo'l q'u niman tetz u Jesuus. Tan b'a'n si'ane' atoj tu paav utz, ant axh sapotzonaxh ti' u tel iq'ii. Pek tiira kuenta'axh ti' u paav.

<sup>23</sup> Yit' nojla ko'nkoxh a' suuk'a, pek ta'l uuva suuk'a ti' vavuul aas ya've utz, ti' tere'n q'ul ayaab'il.

<sup>24</sup> At unjolol aanima aas vatzsaj q'ul ipaav, ech ye'xtxoj saoki, k'uxh ye'saj itx'olax inujul tu u Tioxh. Pek at unjot majte aas ye' na'l. Anal sailaxi xamtele, aas latx'olax inujul tu u Tioxh. <sup>25</sup> B'a'n saok q'u'l q'u b'a'nla chaj kam ni'ane' tan, atia aas vatzsaj chit q'u b'a'nil ni'ane'. Utz atia xamtel sa'elu'l vatzsaj.

## 6

<sup>1</sup> Aatz q'u niman tetz u Jesuus q'u'l k'ayimal tatin tu aq'on, atoj chit tatin q'u b'aal taq'on siatz. Jikom sa'aq'onini, ech ye'k se'el iq'ii u Tioxh taq'o utz, tuch' viyolb'al. <sup>2</sup> Utz aatz q'u'l niman tetz u Jesuus q'u b'aal taq'on, ye'k teko'nkoxh tatin siatz si'ane'. Ta'n ko'nkoxh satalva oj ela niman tetz u Jesuus tuch'. Pek aal tiira b'a'n taq'onin si'ane'tan, niman tetz u Jesuus u aanima va'l ni'ilon iq'aq'al u taq'on. Utz tii u Tioxh ti' majte.

Ech a' q'u kam sachusunaxh ti' tza'. Utz sab'an ya'l ti' tiq'ot iyak'il.

*Vichokax u tx'ii'b'al q'iiva'l xe' Tioxh*

**3-4** Tz'ejxinaj u aanima oj paarten chusb'al nichusunka aas ye' nik'ul tib' tuch' viyolb'al u kuB'aal Jesucristo utz, tuch' q'u b'a'nla chusb'al va'l nichus u okchil k'atz Tioxh. Paat ye'xhkam nitel itxumb'al tu u yolb'al Tioxh atzi'. Je'naj iatz. Utz a' chit atil k'atz u achva xhaakaluib' ti'aj yol; ech teku'en a' iyaab'il. Tan aatz tu va'l ni'an q'u aanima tzi', chi'k'ulaib' nichee taq'o, ch'a'o, yoq'oib', suyu kam ti' imol. **5** Utz yaayoloib' atil taq'o b'enamen xo'l q'u aanima q'u'l yannaj tek vixumb'al taq'o. Paat ke'ch koj vinujul tzixe'. Utz a' nimotxtitz'a aas kanaal utz, tx'akb'al puaj u okchil k'atz u Tioxh. Ech xaane'l k'atz q'u aanima ech tzi'. **6** Tan mam kanaal chit u okchil k'atz u Tioxh. Ta'ntzii oj satxuq'txuno' ti' u qetz atile. **7** Tan kam koj qetz iq'omiche aas ulo' tu u vatz amlika tx'ava' tza' utz, kam koj saqiq'o b'en aas lakamo'.\* **8** Pek chuspia atil kutxb'al qetz utz, atil qechb'ub'al, ech txuq'txunojo' ti'. **9** Pek aatz q'u aanima q'u'l nitachva tx'iiol iq'iil, kam ko'xh ye'xtxojla kam nitachva. Kam ko'xh onkonil ni'an ti' ichee tetz aas yansanal utz, tz'ejxixsamal q'u aanima ni'ane'. A' niku'k tu u ye'xtxojla txumb'al va'l echa' k'aa txayb'al tetz q'u'l niniman. **10** Tan aatz vixe'al kajay q'u onkonil, aya' u tz'ejxichil ti' u puaj. Tan ech i'an unjolol. Tz'ejxo'k ti' utz, eltekka ti' inimal u yolb'al Tioxh. Loq' tilayol q'u mamaj k'axk'o motx paalku ti'.†

### *U taq'ax yak'il k'atz u Tioxh*

---

\* **6:7** Choktaj u Job 1.21; u Salmos 49.17. † **6:10** Choktaj Q'u Hebreo 13.5.

**11** Pek aatz sa'an'e Timoteo, chok eel tu q'u kam tzi' tan, axh ma'l vinaj tetz Tioxh. Utz a' sa'an vijikomal. Saxaanok'axh k'atz Tioxh. Sak'uje' ak'u'l ti'. Sa'an tii'axh ti' aanima. Atoj apaciensia. Aq' ku' iib' vatz u Tioxh. Ye'k saje'sa iib'. **12** Aq' yak'il ti' u yolb'al Tioxh va'l nikunima Timoteo. Echa' ch'a'o sa'an'e. K'on avaanima ti' q'u kam q'u'l satiq'ob'enaxh tu b'enq'ii b'ensaj tan, ech ti' isik'le'axh u Tioxh. Utz a' va'l ooksa iib' ti' ib'anle' vatz sib'al aanima. **13-14** Nima va'l nival see tza'. Ni'xhval see vatz u Tioxh, u itz'pixsan tetz q'u kam kajayil. Utz vatz u Jesucristo nival see majte, va'l tal vinujul tu u Pilato. Ayansach iib' tu u paav. Ech ye'xhkam sa'alax sai', ul nal ko'xh u kuB'aal Jesucristo.

**15** Aya' u tuleb'al va'l k'ajel nal titxumb'al u techalla Tioxh va'l ta'xh ma'l tijlenal q'u ijlenal utz, iq'esala q'u q'esala. **16** Aya' u Tioxh va'l ye'xhjatu sakami, ye'k tokeb'al u kamchil ti', va'l ab'il koj ma'j ilonnaj iatz. Tan a' atik tu u techalla tatib'al sutimal ti' tu mam rib'unnaj txijtxub'al va'l sa'kojveet toko'p aanima tuul. Utz tetz u tokeb'al q'ii; tetz u mam q'esalail b'enamen. A'i.

**17** Al tu q'u tx'iiol iq'ii aas yit' sa'kojmotxje' ivatz. Utz ye' k'uje' ik'u'l ti' q'u tx'iiol iq'ii tu u vatz amlika tx'ava'tan, niko'nimotxe'. Pek a' sak'uje'k ik'u'l ti' u itz'lich Tioxh va'l tiira tz'ajel iatz qetz nitaq'e', ech nikub'anb'e. **18** Chus te aas a' samotxtoksav q'ul ipuaj ti' ib'anax u b'a'nil; tx'iiol iq'ii tu u b'a'nil si'ane'. B'a'n ichajpe'l tetz si'ane'; oora salochoni. **19** Tan oj ech si'ane' tzi', tx'iiol iq'ii nimol tu Amlika; nichik u b'a'nil tetz taab'ab'en; ye'k imotxe'. Utz sichab'a u b'enchil tu b'enq'ii

b'ensaj majte.

*Vit'oyax u Timoteo tu u Pablo*

<sup>20</sup> Timoteo, a' chit noj a'an q'u kam aq'el see tu u Tioxh. Maj iib' ti' q'u txayi'b' ti' yol. Tan ye'k itxa'k. Kam koj kanaal ti'. Utz maj iib' ti' q'u yaayoli'b' q'u'l nichee tu va'l "mam txumb'al" chu te'le'; loq' yit' a' koj. <sup>21</sup> Tan aatz unjolol q'u'l niniman q'u kam tzi', elyuka ti' inimal u b'a'nla chusb'al.

Vib'a'nil koj u Tioxh atin sai!. A'i.

**Viak'la txumb'al u tioxh  
New Testament in Ixil Cotzal; ixl (GT:ixl:Ixil)**

copyright © 2001 Wycliffe Bible Translators, Inc.

Language: Ixil

Dialect: Cotzal

Translation by: Wycliffe Bible Translators, Inc.

**Copyright Information**

© 2001, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ixil

**© 2001, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files  
dated 29 Jan 2022

ded0b994-e0fe-5888-83c4-9cf32f4765e1